



Publicaziuns dalla vischnaunca, jamna 15

Lubientscha da baghegiar

L'istanza da baghegiar ha concediu suandonta lubientscha da baghegiar:

Nr. 2011-1019

Stweg Disentiserhof, c/o Montana AG, Bahnhofplatz 8, 7000 Cuera; nova entrada pil plaun sutterrán ed adattaziun dils contuorns, parcella nr. 1002, Via Disentiserhof 3, 7180 Disentis/Mustér.

Quella lubientscha sa vegnir contestada enteifer 30 dis dapi la publicaziun el Fegl official dalla Surselva tier la Dertgira administrativa dil cantun Grischun.

Disentis/Mustér, ils 12-4-2011

Uffeci da baghegiar Disentis/Mustér

Annunzias da baghegiar

All'istanza da baghegiar ei sin fundament digl art. 64, alinea 2 dalla lescha da baghegiar e digl art. 40 dall'ordinaziun davart la planisaziun dil territori dil cantun Grischun OPT vegniu annunziau suandonts projects:

Nr. 2011-2025

Theophil Loretz, Via Iert 1, 7186 Segnas; lavurs da contuorn e construcziun d'ina seiv nova, parcella 68, Via Iert 1, 7186 Segnas.

Nr. 2011-2038

Markus Rigolet, Gassa da Cuoz 31, 7186 Segnas; montar collecturs da sulegl vid la seiv encunter sid, parcella 1213, Gassa da Cuoz 31, 7186 Segnas.

Nr. 2011-2039

Kurt e Cornelia Ulmann, Via Davos Mustér 3, 7180 Disentis/Mustér; remplazzar la cuvrída ed isolar il tetg casa, parcella 897, Via Davos Mustér 3, 7180 Disentis/Mustér.

Nr. 2011-2040

Christian e Gertrud Schnoz-Gerig, Via Cuoz Sut 6, 7186 Segnas; sanaziun ed izolaziun dallas fatschadas dalla casa e remplazzament dallas finiastras, parcella 1223, Via Cuoz Sut 6, 7186 Segnas.

Nr. 2011-2041

Artavels Battista Columberg-Zürer, c/o Gion Fidel Columberg, Brunnmattstrasse 20, 6010 Kriens; refrestgentar las fatschadas e remplazzar las schalusas dalla casa, parcella 687, Via Cons Sut 1, 7180 Disentis/Mustér.

Nr. 2011-2042

Oscar e Simone Duff, Campliun 309, 7166 Trun; spazzar il baghetg d'economia nr. 539 cun baghetgs annexs, parcella 409, Pardomat, 7180 Disentis/Mustér.

Encunter quellas decisiuns san ins protestar a scret enteifer 20 dis dapi la publicaziun alla supras-tonza communal.

Disentis/Mustér, ils 12-4-2011

Uffeci da baghegiar Disentis/Mustér



Administraziun communal

Sur Pastgas ei l'administraziun communal **serrada** naven da

gievgia, ils 21 d'avrel 2011 allas 16.00 entochen
mardis, ils 26 d'avrel 2011 allas 9.00.

Administraziun communal Disentis/Mustér

Revisiun parziala dalla planisaziun locala

El rom dalla realisaziun dall'Ovra electrica Russein eis ei necessari d'adattar la planisaziun locala. Quei pretenda ina revisiun parziala dalla planisaziun locala. Dapi la davosa revisiun totala eis ei semussau ch'ei basegna tscheu e leu pintgas correcturas. Quellas savessen vegnir cumbinadas cun la revisiun parziala previda.

Perquei envida la suprastonza communal proprietaris da terren d'inoltrar giavischs per pintgas midadas, adattaziuns ni correcturas da cunfins entochen **igl 1. da matg 2011** agl uffeci da baghegiar. En quella procedura eis ei pusseivel da risguardar sulettamein pintgas modificaziuns ni adattaziuns da cunfins denton neginas enzonaziuns novas da terren. Tenor conclus d'approbaziun dalla Regenza dils 26 da matg 2009 ei ina engrondaziun dalla zona da baghegiar pil mument sclausa.

Per ulteriur sclariment stat il menader digl uffeci da baghegiar bugen a disposiziun.

Disentis/Mustér, ils 4-4-2011
Suprastonza communal Disentis/Mustér

Agricoltura:

Concediu in credit pil concept per surfatschas da cumpensaziun ecologicas

En connex cun la preparaziun dil studi per ina meglieraziun funsila ei semussau l'urgenta necessitad da fixar las surfatschas da cumpensaziun ecologicas (Vernetzungskonzept). Ils pagaments directs ein per part cumbinai cun quei concept.

A vesta dalla necessitad ed ils avantatgs per l'interessenza purila ha la suprastonza communal concediu in credit da frs. 40 000.– per l'elaboraziun dil concept per las surfatschas da cumpensaziun ecologicas.

Aschinavon che nossa vischnaunca meina atras ils proxims onns ina meglieraziun funsila, vegnessen quels cuosts integrai en quei project e cheutras subvenziunai.

Suprastonza communal

Restricziuns da traffic a Raveras

Nova signalisaziun

En sia seduta dils 14 da mars 2011 ha la suprastonza communal fixau suandontas restricziuns da traffic a Raveras:

Scamond da parcar signal 2.50

Cruschada Via Pintga/Via Raveras, entir plaz

Cruschada Via Veglia/Via Raveras, entir plaz

Cun quella signalisaziun duei vegnir prevegniu che vehichels parcai senza dretg impedeschien il trafic sin las piazzas publicas.



La mesiras previdas ein vegnidas sclaridas cun la polizia cantunala, che ha concediu ils 31 da mars 2011 il consentiment a basa digl art. 7, al. 2 dalla lescha introductiva tier la lescha federala da traffic (EGzSVG).

Objecziuns e propostas en connex cun las mesiras da traffic previdas san vegnir inoltradas enteifer 30 dis dapi la publicaziun el Fegl official dalla Surselva a scret alla suprastonza communal Disentis/Mustér.

Suenter haver examinau las objecziuns decida la suprastonza communal e publichescha siu conclus el Fegl official cantunal cun la pussevliadad da contestar il conclus tier la Dertgira administrativa dil cantun Grischun.

Disentis/Mustér, ils 12-4-2011

Suprastonza communal

Reglament da traffic

Sebasond sin art. 12 dalla lescha forestala dalla vischnaunca da Mustér ha la suprastonza communal approbau ils 4 d'avrel 2011 in niev reglament da traffic. Quel entra immediat en vigur e remplazza il regulativ da diever dallas vias d'uaul cun vehichels a motor dils 2 d'october 1998.

Il niev reglament vegn publicaus sin la pagina d'internet www.disentis.ch sut spurtegl virtual/leschas ni sa vegnir retratgs al spurtegl dall'administraziun communal. Ultra dil carrar sin las vias d'uaul vegn da niev reglau il diever dallas vias funsilas e las vias per l'avertura dil territori da baghegiar.

Ina lubientscha annuala vegn concedida per diever agricol, a proprietaris da beins immobiliars e d'affittaders pigl access al schischom, a furniturs, glied da professiun, guardiacamonas, concessiunaris per praticar lur activiad.

Persunas che han negin dretg da carrar sin vias d'uaul e vias funsilas san retrer ina carta dil di ni ina carta dall'jamna.

Taxas

Carta annuala (diever agricol) frs. 20.–

Carta annuala frs. 100.–

Carta dall'jamna frs. 30.–

Carta dil di frs. 15.–

Las lubientschas da carrar san vegnir retratgas al spurtegl dall'administraziun communal. Quellas dil di e dall'jamna plinavon era ella cafeteria dil Center da sport e cultura.

Suprastonza communal

Controlla da habitonts

Naschientscha

Neal Vinzent Fry, naschius ils 3 d'avrel 2011, fegl da Tobias Konrad Schuster e Larissa Fry.

Mortori

Irma Camartin-Cavigelli, naschida ils 2-8-1917, morta ils 6-4-2011.



Camps Cadi 2

Per la secunda gada a Köln e contuorn

Per il camp per giuvenils dalla 6. entochen e cun la 9. classa ha ei aunc plazs libers. Dapli informaziuns anfleis Vus sin nossa homepage sut www.campscadi.ch.

Davos termin d'annunzia ei ils **30 d'avrel 2011**. Bugen occupassen nus tut ils plazs el bus per aschia reducir cuosts.

Team Camps Cadi 2

Rimnada da pupi

Venderdis, ils 29 d'avrel 2011

Adatg! Ei vegn mo rimnau: gasettas, illustradas, catalogs, cudischs e prospects stampai.

Il pupi sto vegnir deponius sper via (sche pusseivel in di avon). Igl ei impurtont da ligiar bein il pupi e da buca far memia gronds pacs. Engraziel.

Nus rimnein buca cartun. Quel sa vegnir deponius a Raveras igl entir onn ora e quei las mesjamnas (16.00–17.30) e sondas (10.00–12.00) e buca durant la rimnada.

Bien engraziament per Vies agid e sustegn!
Scolas Mustér, Ch. Berger

Radunonza generala dalla caplania Segnas

La radunonza generala dalla caplania Segnas ha liug

gliendisdis, ils 25 d'avrel allas 19.30 en sala dalla casa da scola a Segnas.

La gliesta da tractandas vegn publicada en scaffa-baselgia a Segnas.

Cordialmein envida
La suprastonza

Apparats d'udida

Mesjamna, ils 27 d'avrel 2011 denter las 14.00 e las 16.00 saveis Vus schar schubergiar e regular Vies apparat d'udida en Casa da tgira Sursassiala. L'uniun Pro Audito Chur, cun signur Arthur Jacomet fa quei survetsch per tuts interessents gratuitamein.

Liug: Casa da tgira Sursassiala, stiva da schiember.

Cordiala invitaziun
Casa da tgira Sursassiala



**Nordic-Walking:
Sentupada**

Naven da mesjamna ils 20 d'avrel serimnein mintgamai la mesjamna allas 19.30 avon la halla Cons. Prender part sa tut tgi che ha plascher da ir cun festa e far pintgas turas en cumpignia.

A stedia participaziun selegra
Erna Hosang

Uniun da dunnas Mustér

Sonda sontga sera avon messa vegn vendiu las candeilas da Pastgas. Prezi frs. 12.–.

Movis: Zumba-fitness

Saltar e trenar la fitness en atmosfera da party quei ei Zumba. Ei drova negina experienza da saltar! Cun buna musica latina e sempels pass sas era ti far enzatgei per la sanadad. Il motto ei semplamein semuentar ed haver plascher. Cuors dad otg gadas.

Cu?

Avrel: mardis, ils 26

Matg: mardis, ils 3, 10, 24 e 31

Zercladur: adatg! gliendisdis, ils 6 e mardis, ils 14 e 21

Nua?

Halla Cons Mustér

Uras?

Mintgamai dallas 19.30–20.30

Prezi e damondas?

daniela.vin.de@gmail.com ni 079 214 32 43

Jeu selegrel
Daniela

Interest da sunar in instrument da stuors?

La Societad da musica Mustér envida tuts interessai (scolars e carschi) ad in exercezi public. Suentar in cuort exercezi saveis Vus empruar ora ils instruments e s'informar sur dallas pusseivladads d'emprender da sunar in instrument da stuors.

Datum: **sonda, ils 23 d'avrel 2011**

Uras: **17.00**

Liug: **halla Cons, Mustér**

Societad da musica Mustér

Forum cultural internaziunal Mustér

La radunonza generala dil Forum cultural internaziunal Mustér ha liug **venderdis, ils 15 d'avrel 2011 allas 20.00 el hotel Cucagna** a Mustér.

La suprastonza



**Beach Sport Plaun Petschen, Cumpadials
Radunonza generala**

Mira sut Sumvitg.

**Pro Senectute Surselva
Sault a Sumvitg:**

Mira sut Sumvitg.

Ludoteca Mustér

Liug/Ort: Halla Cons, tel. 076 494 39 92
e-mail: ludoteca@disentis.ch

Uras d'avertura / Öffnungszeiten:
Gliendisdis/Montag: 18.30–20.00
Gievgia/Donnerstag: 16.00–17.30
Venderdis/Freitag: 18.30–20.00

Biblioteca populara Mustér

Liug: Casa da scola, tel. 081 947 52 90, biblioteca@disentis.ch

Sut www.disentis.ch ni www.bibliotecas-surselva.ch anfleis Vus nies entir catalog bibliotecar.

Per e-mail saveis Vus reservar ina ni pliras medias ed enteifer 5 dis retrer ad emprest ellas en biblioteca populara.

La biblioteca ei aviarta:
Gliendisdis 18.30–20.00 uras
Mardis 13.30–15.00 uras
Gievgia 16.00–17.30 uras
Venderdis 18.30–20.00 uras

Nies motto: Leger . . . tedlar . . . mirar . . . !

Nus selegrein da mintga viseta.